



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Oekusi
14 Marsu 2021

Kazu Topu Honis: JSMP husu atu parte hotu respeita no fó konfiansa ba tribunál atu hala'o nia kna'ar ho independente no imparsiál

Iha 23 Feveireiru 2021, Tribunál Distritál Oekusi prezide julgamentu ba krime abuzu seksuál ba menór no pornografia infantíl ne'ebé envolve arguidu ho inisiál DR hanesan eis padre hasoru lezada sira, iha Oekusi. Kazu ne'e sai polémika iha públiku tanba arguidu nu'udar lider relijiozu nune'e hamosu diskusaun pro-kontra kona-ba tribunál ninia independénsia no imparzialidade iha kazu ne'e.

“JSMP husu ba parte hotu atu respeita, pasensia no nafatin fó konfiansa ba tribunál hodi hala'o nia kna'ar. JSMP mós fiar katak tribunál sei asegura nia independénsia no imparzialidade iha kazu ne'e tuir lei, hanesan esperiénsia ne'ebé tribunál hatudu ona iha kazu sira antes ne'ebé hamosu preokupasaun tanba iha intervensaun husi parte oioin maibé tribunál nafatin hatudu nia independénsia no imparzialidade,” dehan Sra. Ana Paula Marçal, Diretora Ezekutiva JSMP.

JSMP apresia aas tebes ho tribunál nia independénsia no imparzialidade ba kazu sira antes tanba serbisu tuir knaar ne'ebé hatur ona iha Konstituisaun RDTL (Artigu 119 no 121 pontu 2 Konstituisaun RDTL kona-ba independénsia tribunál no juis sira)¹.

Aleinde ne'e, JSMP mós husu ba parte hotu atu respeita vítima sira nia direitu no asegura nafatin konfidensialidade kazu ne'e. Nune'e mós kona-ba arguidu nia direitu, maski lei fó dalan ba sidadaun sira atu ezerse nia direitu hodi espresa sira nia hanoin ho livre maibé JSMP husu ba parte hotu atu kontinua tane as prinsípiu fundamental “prezunsau ba inosente” tanba bainhira ko'alia kona-ba justisa formál, tribunál mak iha liu kompétensia hodi

¹ Artigu 119 Konstituisaun RDTL kona-ba independénsia define katak tribunál sira independente no sira sei halo tuir de'it Lei-Inan no lei-oan sira haruka. Artigu 121 pontu 2 Konstituisaun RDTL kona-ba juis sira define katak bainhira hala'o sira-nia knaar, juis sira independente no sira bele halo tuir de'it buat ne'ebé iha Lei-Inan, lei-oan no mós tuir sira-nia konsiénsia.

tetu no decide tuir lei no bainhira kazu ruma nia desizaun iha ona tránjitu iha julgadu mak bele konsidera arguidu sala ka lae. Tanba ne'e, JSMP husu ba comunidade sira hotu atu fó konfiansa ba tribunál hodi hala'o sira nia serbisu no prosesa kazu ne'e tuir lei.

Iha parte seluk, JSMP preokupa ho aplikasaun medida koasaun Termu Identidade ba Rezidencia (TIR) ba arguidu tanba konsidera la adekuaudu haree ba arguidu nia sidadania hanesan ema estranjeiru no mós área ba rezidencia ne'ebé iha possibilidade boot ba arguidu bele halai. Tanba ne'e, JSMP husu ba prokuradór ka juis atu haree hikis fali medida koasaun ida ne'e nune'e la akontese tan hanesan kazu sira antes, arguidu sira (Valentim Lavio, Emilia Pires no Tiago-Tammy Guerra)² la koopera ho justisa Timor nian hodi halai sai husi Timor-Leste depoisde sira hetan desizaun husi tribunál primeira instansia.

Bazeia ba JSMP nia observasaun iha tribunál sira hatudu katak labarik barak mak sai vítima ba krime sira ho natureza violasaun seksuál no abuzu seksuál inklui incestu. Tanba ne'e, atu asegura labarik sira livre husi violénsia sira, JSMP husu atu parte hotu; Governu, sociedade no família presiza iha kolaborasaun hamutuk hodi combate krime ne'e.

Kazu ne'e prokuradór akuza arguidu kontra artigu 177 Kódigu Penál (KP) kona-ba abuzu seksuál ba menór ho moldura penál tinan 5 to'o tinan 15 prizaun konjuga mós ho artigu 176 Kódigu Penál (KP) kona-ba pornografia infantil ho moldura penál tinan 3 to'o tinan 10 prizaun.

Kazu ne'e rejistu iha tribunál ho Nú. Prosesu : 0022/19.PGGCC ne'ebé prezide husi juis koletivu : Dr. Yudi Pamukas, Dr. Hugo da Cruz Pui no Dr. Evangelino Belo. Prokuradór representa husi Dr. Matias Soares, Dr. Ambrosio Rangel Freitas. Vitima mós hetan akompañamentu husi JU,S (Jurídiku Sosiál) : Dr. Olivio Barros no Dra. Hildegardis Wondeng. Entretantu arguidu hetan defeza husi advogadu privadu no defensoria públiku. Advogadu privadu mak Dr. Pedro Aparicio, Dr. Miguel Acasio Faria, Dr. Joao Dunn no Dr. Eusebio Soares no Defensór Públiku mak Dr. Marcelino Marques Coro.

Atu hetan informasaun kompletu, favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Telefone: (+670) 33238883 | 77040735
Website: <https://jsmp.tl>
info@jsmp.tl

² Kazu Tiago Luis de Vilhena Teixeira Guerra no Chang Fong-Fong Guerra a.k.a “Tammy Guerra” https://jsmp.tl/wp-content/uploads/2017/03/SumarikuKazuTribunalDILI_Tetum.pdf no Kazu Valentim Lávio : <https://jsmp.tl/wp-content/uploads/2012/06/Aktualizasaun-Justisa-Valentim-Lavio-Novembru-2011.pdf>